

**Псалом Давиду, вегда измени лице свое
пред Авимелехом, и отпусти его, и отыде, 33.**

Благословлю Господа на всякое время, / выну хвала
Его во устех моих. / О Господе похвалится душа моя, /
да услышат кратцыи и возвеселятся. / Возвеличите
Господа со мною / и вознесем имя Его вкупе. / Взысках
Господа, и услыша мя, / и от всех скорбей моих избави
мя. / Приступите к Немю и просветитесь, / и лица
ваша не постыдятся. / Сей нищий воззва, и Господь
услыша и, / и от всех скорбей его спасе и. / Ополчится
Ангел Господень окрест боящихся Его / и избавит их. /
Вкусите и видите, яко благ Господь; / блажен муж,
иже уповает на Нь. / Бойтесь Господа, вси святии
Его, / яко несть лишения боящимся Его. / Богатии
обнищаша и взалкаша, / взыскающии же Господа не
лишатся всякаго блага. / Приидите, чада, послушайте
мене, / страху Господню научу вас. / Кто есть человек,
хотяи живот, / любяи дни видети блага? / Удержи
язык твой от зла, / и устне твои, еже не глаголати
льсти. / Уклонися от зла и сотвори благо; / взыщи
мира, и пожен и. / Очи Господни на праведныя / и
уши Его в молитву их. / Лице же Господне натворя
щия злая, / еже потребити от земли память их. /
Возваша праведнии, и Господь услыша их, / и от всех
скорбей их избави их. / Близ Господь сокрушенных
сердцем / и смиренныя духом спасет. / Многи скорби
праведным, / и от всех их избавит я Господь. / Хранит
Господь вся кости их, / ни едина от них сокрушится. /
Смерть грешников люта, / и ненавидящии праведнаго
прегрешат. / Избавит Господь души раб Своих, // и не
прегрешат вси, уповающии на Него.